



幼學堂詩稿

戊午春起
至庚申歲

吳縣

沈欽韓

文起

芳儀曲

并序

芳儀者南唐主李景女也金陵破後入汴嫁供奉官孫
某孫爲武疆都監沒於遼芳儀爲遼聖宗所得拜芳儀
生公主一人鼯無咎顏長道俱作長歌以哀之余乃爲
廣其意仍曰芳儀曲云爾

江南國勢看日促
峴口青山空極目
黃花水沸急火油
瓦官閣上千人哭
已共原鴿作布衣
傷心降邸賜牽機
金經一卷施喬氏
玉軸千函殉保儀
河西隴右應轉徙
難將忍

寵錢王比李勢妹屈雌聲奴馮弘女作天家婢幸從供奉
殿頭官不與清河公主看新上玉釵驚別燕重圓寶鏡對
迴鸞鍾山回首雲煙滅崢嶸口攜行隨宦轍羅衣綽約裂邊
風鬢朶羸垂飄朔雪朔雪邊風萬里秋黃昏胡騎聲啾啾
夫人城上霜笳苦君子館中風旆愁傳聞六郡良家子自
出三關棄犀兕投鞍幾至困平城駐蹕誰能渡遼水從此
遊兵斥雁門兒家夫婿沒胡塵驚偷驢耳鈔糧路看挂男
頭載婦人屬朔聒帳魂驚墮細骨輕軀羸特馱金屑琵琶
玉面遮不堪重唱家山破七鑊羞持玉鳳凰羊車新入脂
粉囊木葉山頭望漢月回心院裏教胡裘西樓射獵打團

斗瓊珞金花貂煥手詐馬筵開元玉漿頭鵝宴奉羔兒酒
敢將顏色比焉支洗淚依然十二時不信斷魂生碧草果
然薄命在蛾眉當年洪都駐禁旅廬山觀內摩厓處曾聞
南嶽比東朝卽見天孫爲帝女家事相傳壞阿兄袈裟膜
拜佛前燈當國只知殺潘佑臨戎真悔信劉澄玉李金魚
成一夢瓊枝璧月臨風慟蜀王一旦化嗁鶻秦女幾時翔
彩鳳赤罽駟車莫復論拂廬蕃語乍承恩畱將突厥屏風
句畧比崇徽手爪痕由來萬事反乎覆但羨文姬百錢贖
江南千里本無家謾把鄉心寄黃鵠記得小樓吹玉笙落
花流水若爲情休將諱子胡琴調偷入霓裳疊拍聲

題謝皋羽西臺慟哭記

步兵死千載空山無哭聲不知文丞相終作顏杲卿乃令
汐社老一撫唐衢膺不悲柴市日畢志歐刀刑念其破家
後灑涕勤王兵囚服鎮江館丐食廣陵城忼慨出百死志
欲同程嬰厓山一覆敗無異長平阬慘慘七歌闋四望穹
廬平何勞太學祭不求承旨生零丁礪州洋復有蒲壽庚
可憐柰何帝月落號冬青銅人辭漢闕石馬僵昭陵迴思
乞兒物空悲問饒形紇干白翎雀飛去生處鳴黑河秋雨
引嘈嘈斜喝營持此訴天地淚如疾河傾浮雲從南來飄
忽隨奔霆幽篁觸劍戟愴恍神物憑峩峩富春山渺渺桐

江清洲洲靈鼓發鬱鬱樓林冥江南乾滯土魂魄樂且寧
青春旣殂謝將使蛟龍迎

閨意二首

六扇屏山春夢遶梅花落盡無人掃晃眼朝光嬾畫眉鏡
臺飛上收香鳥

斜拋鈿鉚卸鸞篋夜雨濛濛鐙火迷戲罷擊蒙金葉格綠
窗又報汝南雞

清明日同褚

通經遊畢尚書山館

垂楊翦翦染新煙波影嵐光兩自妍礪戶無人山鳥寂石
梁一道落寒泉

流蘇白馬庾公歸山鬼含情薜荔衣
畱得故家閒草木四時仕宦鬪牙緋

小婦青谿學浣紗葯華芷秀屨廊斜
山靈底事成惆悵咄咄書空木筆花

欲薦溪毛弔永夫

詩人張永夫墓在山麓

蹋青遊女印雙絢迴車莫

效王融歎好寫春山蠟屐圖

朱勾龍爽有春山蠟屐圖

過靈巖寺示巨文僧

杏花沽酒路明滅侶揚微雙燕迎風小
千家擁綠肥冥求鍼孔理鬧觸箭鋒機
拈得紅心草梧官春夢非

虎邱

稚兒墻下鶯如語短簿祠邊柳似絲
人倚畫樓拈翠管天開明鏡鬪蛾眉
朱輪花送劉賓客燕寢香分韋左司
雁齒紅闌橋四百客來惆悵玉鸞吹
頗憶蘭香送鈿車自將元髮祝蒼華
柳分眉月雙枝艣花壓鬢雲六扇紗
紫陌休逢珠絡鼓紅塵強蹋繡床鞞
歸來掩戶工愁甚欲捻琴書付酒家

館舍遣懷

塵機何日貸雞竿骯髒門邊側注冠
飲酒自來尊畧濕賣文幾許筆長乾
枯魚未識江湖樂窮鳥誰言天地寬
又見殘春隨逝水莫辭把火牡丹看

格是生平比四雖一年孤負牡丹時關心好句旋忘失可
語同人總別離老去拚如蠶作繭生前謾要豹留皮綠陰
匝匝春光晚猶有飛花入研池

立夏日小飲

尋春悵已遲東風敗人意天高奈此情商畧付一醉貧難
具皮囊恩婦脫半臂餽釘致櫻筍饑體出餅餌相對送斜
陽相憐倚薄袂燕語多傍簷花飛不到地如何杜宇心一
刻春難繫終古怨芳魂無處洒清淚憶昔賦遠遊極浦含
愁思風雨一宵深岷岷空凝睇碧雲望江南何處雙眉翠
此際餞韶光心情作何味及茲幸比肩把酒宜自慰神全

觀我生形格求自試之子種蕙蘭勗哉保芳歲

傷春絕句

欲將幽恨卜琵琶練帶交飛日又斜一迳新苔綠如許可
憐解語女郎花

飛花萬片逐東風愁絕新聲盛小叢泣向黃昏玉階下試
將清淚抵殘紅

愁雲曹澤自茫茫欲跨紅鱗水氣涼一曲朗陵花未歇清
波如帔月如璫

綵旛猶祭主林神蹠蹠斑駁碎玉塵幽夢未成鶉鴉喚幾
能強起送殘春

初夏登樓寄錢大

香冷鐙殘到夜分，小樓吹笛自氤氳。
坐窺潭月情如水，臥掩屏山夢作雲。
與世周旋寧識我，此心鄙吝輒思君。
孔賓豈待人呼去，已欲流連魚鳥羣。

清宵睡破晚甘侯，歎息吾迂淹此畱。
深窵茶蘼明月夢，遠林鷓鴣暮煙愁。
豪情誰作王當代，佳句多慚趙倚樓。
不擬唐文卜奇中，此生那望錫金鉤。

移寓齋偶成

暫來休夏拂輕塵，襪被囊衣自趁身。
乞食每多經宿戀，立錫已歎隔年貧。
松嫌寂寞吟風遠，竹報平安挹露新。
萬卷

擁書元不惡病魔，何事又撩人。

題李長吉集

刺促男兒志多慙，奉禮郎生前笑元稹。
死後憫韋莊玉版新宮去，龍材昌谷荒穉郎真鹵莽輕詆雁門行。

同徐茂才葵陸布衣鵬飲桃花橋酒樓醉歌

天涯芳草憐青袍，春江綠波滴小槽。
有口安能但飲酒，有手焉得勤持螯。
塊磊蹇產盈癡腹，祓除無奈愁將牢。
江湖放浪有老鐵，握手一笑真吾曹。
徐郎脫帽頗小異，苦吟奮颯凋鬢毛。
清光相映梅葉閣，軟塵共蹋桃花橋。
但日禰衡有規檢，豈知磊落皆詩豪。
胡床羅列真率會，犇走客作紛

煎熬長罌唧唧牆下泣俠氣不禁精兵麤枯腸瞥若決渠
溜豎義騁辨何滔滔經史紛綸素積貯如出竹木裝千艘
劃帆滄溟寄一快那顧谿澗浮舸艚蠟淚成堆未欲起仰
眠星月當空高執爵睢盱復跛踣亡所訾省意自詔吾儕
法性異獍獠俗人詈口如山膏常思騰身跨汗漫不爾才
鬼堪同教思此狂態固有幾神鋒太儁非鉛刀如彼人才
已令僕胡爲四壁嗟蕭騷食羊錢能月支取相覓沽酒誠
樂陶從今相逢莫稱貓幸不飢虎須釣鼈

疊前韻寄徐葵

座中誰工鬱輪袍綠巾何惜操檀槽年華荏苒修蛇尾世

味摘剔空蟹螯挾策携蒲固等耳亡羊之後思補牢那有
樂事尋詩酒比宜料理居馬曹但恐頭顱鮮蒜髮未夢足
踝垂修毛友朋感召持意氣笑呼天畔飛銀橋把杯一洗
風塵色相看猶是元龍豪預知良會不可再造物所忌心
焦熬不識柘鐺自俗眼糟邱拔幟疾鬪麀錢鳳何人共溫
嶠袁宏此志羞伏滔興酣起作柘枻舞未至羊俛燒連艘
書生自笑窮家活不須重物迮輕艚直當嘯詠風濤上氣
吞溟渤星辰高神山匪遠幸可卽迴瞰下土多淫諂倒挽
銀河作一醉惟天狂態諳相遭可憐嵒屈但鬱鬱燈檠黯
淡焚豨膏草龍木羊作癡想赤明何日遊盧敖詩語瓌奇

嘲萬類臯誠可殺封歐刀眼光所出牛背上堪飲美酒歌
離騷常羨徐公處通介鴟夷滑稽猶舊陶故實莫夸能記
貓險韻鎮紙山戴鼈

讀北周書

使君簫鼓入平涼鼎足三分勢已張試問何如賀拔岳岨
強亦作點頭王

非貉非狐齧斷根避湯入火謾圖存柳蚪他日書青簡可
獨人臣賀六渾

沙苑潼關料敵先老黑當道復回鞭高王顛倒英雄手翻
被擲掄一郭賢

負氣矜功噲伍羞欲成門戶豈良謀兒曹刺舌深相戒又
與高公共斫頭

督將何如俊父招江東文物望風遙偏知蘇綽真奇士臥
對屏風誦六條

方駕齊驅四后車外閒樂事未能如堪憐奉作黃皇主應
悔官中改詔書

一領錦袍記淚痕明駝相送阿摩敦稱觴上壽須臾事不
到悲呼瓠破門

惜爾不殺王胡布反間東朝韋孝寬但使高山摧破後堪
畱明月照長安

乞命西鄰作坳庸甘同百獸舞時雖新朝執手徒虛語旋
見蕭琮莒國封

讀梁書

郢城毛人踰堞哭鳳度三橋黃麗縛龍行虎步非常人三
十侍中意猶薄馳兩空函得一州當年意氣矜無儔卻憐
老作中原夢破壞金甌滿目愁

檀溪竹木喪千艘大盾數百環周遭英雄豈止救死計呼
吸智勇如奔濤何況酒酣星下語離席鄧晨已相許令君
俛首受金甌不負蕭鸞一坏土

朝廷無福景不死折箠難答誰料此晉矣舉措笑千年南
岸援軍應敕止有梁正士命如何曲項琵琶作挽歌一家
難替蒼生厄誤國無如朱彥和

北顧亭邊傳反氣移檄誰知無下意一門之內極兵威家
國去矣堪流涕七官文士幸收功卻結西鄰棄故宮讀書
萬卷知何用香火因緣泣向東

荆山爲上浮山下長虹臥波來走馬杵聲震動蛟龍宮搜
剔木石山童童惡風鼓浪支祈怒倒卷沿隄十萬戶君王
然香復懺罪不使冤魂淪孽海

謳歌已在行中水懷中詔書出一紙壽光閣外莫徘徊引
手向左望不垂署名當日無書聖

王

赤章卻笑隱侯病猶

有前朝老伎師能識東宮舊家令

禮樂衣冠推正朔重雲聽講士林學自以浮屠飾太平五

經經義空揚推肯事深陳有賀琛謾將要腹驗勞心東宮

復尚元虛習無怪神州至陸沈

王質退軍庾信走韋粲何情更飲酒不量彼非禦侮才青

塘力戰悲傳首登壇何者稱都督蔑棄君親甘屈辱欲知

梁代有忠臣姚察贊語但數一門登鬼錄

兔頭蝦蟆壓城壕擢手鵝舫復千艘功名豈數趙伯超逆

賊皮囊盛子逃江陵已陷貞陽至反使司空假大義當年

無故遣王琳忖彼與官爭為帝

立秋日小集簡徐淡如

一笑鯨魚共出遊鳳條引露拂銀鉤書傳數卷堪爭命酒

到三升也壓愁垂柳天涯曾送客暗蛩鏡下已迎秋君看

銀漢終清淺未許乘查問斗牛

朝來折簡至丹砂揮塵籛條日易斜飄泊虛舟愁似海遲

回仙枕夢為家望塵肯作方三捺行卷空爭溫八义誰遣

詩情感秋氣繞林三匝歎生涯

寄內

夏衣那得埶詩筒紫鳳天吳裋褐中豈有文章驚瘴鬼謾

將肯命恨尸蟲鑪香燭淚堂前夢帽影鞭絲陌上風閑殺

張郎畫眉手只教結眊遣愁衷

遣興

生衣綵繚怯秋風露坐檐牙月似弓三徑多荒憎鞠虎一枝難借歎桃蟲應添冷眼卿慙長莫信剛腸佛佞公俯仰此身如湛輩可憐徒手困英雄

詩冢爲梁溪賈布衣作

文章體勢不可極如天青蒼谷深黑梁谿文獻接千年山水清音是詩國幾輩娜嬛福地人新篇競向龍梭織心血谿提瀝已枯一朝寂寞那拋得晴沙先生東林主主持風雅勤搜取千子佛名驚燕題一車鬼簿謾觴數仙官欲奪

恹逡巡鏡光如豆詩魂苦郊寒鳥瘦總取材墨花洒處飄香雨金薤琳琅畧糟粕賈生哀此猶應哭匹如退筆可歸休莫似古書復流落時亮之窟闢四隅巫師大招野返虞雖無光氣照東壁猶令芝菌蒸幽墟光怪文心原不死夜夢衣冠出故紙一坏仿佛鮑家墳鬼唱寒星宿草裏遂使吾儕一破顏箸書盈尺期歸此賈子聲名動日邊江湖尚及置三編賈有第五倫譜相從梧茗磨山下宰木斜陽弔響泉時晴

沙先生已歿

初冬遊靈崑過畢尚書園林二首

閉戶無外營亦覺冬日永好山似延佇良知同造請雲深

辨樵蘇露寒絕蟬黽翠壁酣新霜丹林媚韶景凝睇自含
情美人何寂靜花宮香夢殘鏡檻玉波冷峰黛溼蘿煙佛
髻明鐙影悵然望錦帆邈矣窺智井莫問蔚藍天試越招
提境

一徑穿雲來夕陽明花隴迴瞰翠微巔嵐氣聳眉宇秋聲
愴深院晚香媚老圃茈蕪度蘭阪蹊眇當桂戶白沙聚若
雪長松碎含雨征雁時一行晚炊自千縷石鏡掃織眉寒
煙澹細語鶴夢冷吳山蘭心泣胥浦秋水隔娟娟風月久
無主

登樓用陳二韻

謾乞人間贖釣船闌干百尺瞰林巔字明屋角堪成諾詩
聽茶聲卻得連用段成式事貧女生涯一鐙下騷人心事九秋
前縈青繚白諸天遠一箇風旛破晚烟

寄華二

隻埃誰歌穆護沙楸頭船見下魚叉淺深紅葉揚州路凋
盡秋江湖目花
亂山明滅酒旗斜欲插茱萸感歲華一夜詩魂驚落葉覺
來殘月下窗紗

疊前韻

歸雁初經破訥沙畫簾慵展玉雅叉黃昏客散廉纖雨落

盡閒庭寒露花

寶瑟生塵屈戌斜闌干拍遍惜瑤華九張機下寒蛩苦夢
遶閨中韻字紗

簡徐淡如

故人虛誦揠愁工

揠愁詞見馬端臨經籍考

屈首鄉豪與郡崇自古人

才如置奕只今天道似張弓頹唐尚可三升酒落拓俱無

一畝官薄歲儺公要禳祓先生未許更畱窮

唐詹山集中有畱窮詩

展重陽同陳大

兆儲

王大

洲

飲敦好齋中醉歌戲贈

高林拉雜重陽雨秋嵐破碎絮雲補稻孫樓邊列岫俯打
頭黃葉空中舞蝓腹生涯何所主高陽酒徒相爾汝卻似

米顛逢賀鑄伸筓一笑橫天宇克敵能閱牀子弩誰信書
生力如虎期君拔戟領僮楚歸乞小師侑樽俎使我他年
覓醉處或解登牀睨嚴武興酣百怪入腸肚有腹可奉掌
可拊兒童驚叫客排戶後來應是光孟祖不復敗人非俗
侶毋多酌我更狂語風廊蕭瑟面場圃芙蓉濯濯秋風苦
倒著接羅神無忤揮毫錯落珠璣吐手捫星辰粲可數不
覺白眼青天覩歸去橫眠寂更鼓明朝惜別悵南浦

題汪

涵金

一席安身圖

知君雅素傲元龍憔悴風塵索放慵五岳真形曾著腳九
州老氣謾填匈男兒墮地原非福飛鳥依人似可容三宿

忽忽寧暇暖橫山羨殺太平農

汪自號九峯山下太平農

南窮閩海北蕭關天似穹廬月一彎少日釣遊輕白社暮

年魂魄戀青山一瓊未落偷兒手廣廈誰開寒士顏卻把

蚶蛤毫拂拭急衰卸後忒蕭閒

我亦栖遲百不能草萊無夢繞柵棧半襦每許分江革重

席誰當坐戴憑霽色青山雙蠟屐秋痕紅樹一漁燈題詩

索與羊何和主客圖中耐久朋

鑪經卷足安禪丈室猶存法喜緣鋪地落花愁中酒撩

人芳草夢含煙且消清簟疎簾趣也殼殘杯冷炙憐果否

山貲囊橐就閉門卻埽自安便

題橫波夫人畫蘭

粉印脂香絕代人紅蘭大抵是前身風枝嫵娜纖要舞妬

殺當年馬守真

家法由來似仲姬麋九犀鎮露痕垂碧闌干下曹陰甚未

著羊肝半臂時

有馬湘蘭題詩應是未歸合肥時所作

玉京流落白門愁斷素零紈誰與收芳草美人原共命國

香無價屬眉樓

季布紅粧最有情題詩敲斷玉釵聲同心粉院聯羅帕也

抵東南復社名

雨後卽事

一雨無乾處今朝埽宿氛鏡磨天卯色縠皺水鞞紋
如圍夢歸雅欲碎雲曬書忙未了迄著趁斜曛
下釣尋谿爰知添水一篙官街嫋楸綫老圃摘葱袍樹杪
生煙直簾鉤送日高舉家愁食粥那許醉醅醕

題徐待詔室吳夫人寫韻樓集

鈿閣倚垂楊靈芸十里香點筆珊瑚格擁書瑋瑁床日長
惟試茗窗曉乍臨妝代書葛小玉問字謝三孃比肩有玉
樹攜手聯瑤章

一夜梨花里鶯聲送好春春風吹麗句唱遍采香人筆花
紅雨潤書葉綠蕉新但織龍梭字不解翠睂顰他日常璩

志大雅當扶輪

汾水湖邊路煖煙長玉芝桃花泛流水片片衍波詞種得
三花樹抽將五色絲綵箋寫魚子麋丸研兔枝從知鄭家
婢皆習毛公詩

秋日同汪剛身遊姑蘇山越紫石均自走馬塘歸二首

霽色快清佳秋山如有約掩戶工言愁散策聊行樂輕霏
暖陽林涼颺動陰壑征鴻激清響歸雲繚絕嶠言從姑蘇
臺徑度純陽閣研材委不收詩思紛誰託野花擢晚秀山
泉洞清酌之子具勝情相遭淡與泊尚戴遠遊冠風塵遡

京洛何日結寒山文身共采藥

空山舞黃葉羈客驚秋心天末歛陰靄林端散高礎卻望
走狗塘斜陽掠歸禽邨煙向晚急草露染秋深霞舉豈不
樂可惜判離襟坐擁寒蛩褥獨撫焦桐琴君理京口權故
山夢應尋倘寫鵝谿絹萬疊烟嵐侵分我一壘秋伴我滄
浪吟

題羅昭諫集

誤他無兒又無名流落江東已半生莫怪感恩雙淚落此
才憔悴望河清

龍尾燒殘國已墟上書討賊竟何如是間解殺吳仁璧休

刺西湖使宅魚

夜坐

上弦月似水犀梳思接良朋讀異書生意婆娑醋心樹才
名眇小達頭魚枕函入夜蟲聲碎花當經秋蜨影疎堪作
尚書都令史相逢只揖道旁驢

冬日同廖文錦遊米堆山得勁韻

貪與白雲接不知山路寬寒葉脫無聲朔風來有令徑微
屐齒輒輒材屐見晉書帝紀霜重衣稜勁同儕聯襪招山僧出林詞

浮嵐清若空流泉仄復正步危曲磴尋坐喜繩床併苔岑
脊遐眇蘚壁契前聘瓏玲架屋偏櫺櫺當窗清冬心抱芳

非古歡結清靜章就應呈佛茶宴不中聖松欵山髻墮石
屏花鬢偵篋笏竹下疎蔓菁菜甲咸嘗聞淡天機因之寬
濃性拂袖山花鮮倚杖林霏靚單椒夕照隕秀澤遠颿輕
牽正足繭愁犂确寺幽幸造請談思道南張隱借谷口鄭
切 茲遊不可忘染翰題名姓

題沈上舍懷雲亭

懷雲亭子古觴詠最風流簾影斜當午苔痕闇換秋遠山
通倚郭嘉樹欲藏樓便得濠梁趣儵魚正出遊
把臂同芳醕題襟共縹囊鷓鴣將葉影蛺蝶帶花香石古
生雲煥池寬浸月涼薰爐添小炷相對送斜陽

題僧壁二首

小雪散遙林老圃香微逗山空翠禽語月影窗前瘦
峯高不可捫樵斧雲中響斜陽落磻西笠影蒼苔上

中秋風雨聯句

良晤月圓昔湖滹劃短楫欵韓况有遊山約相逢素心愜
嘉定廖文錦 竟為信宿謀雞黍情欸浹欵韓曲橈難豨膏
虛庭脫蠹葉文錦聲戰宵炕叢影弄旬羸莢欵韓玉宇想
高寒天門望焯燿文錦盈虛感醒魂陰晴驚夢屨欵韓印
海孕珠胎沿廊濕錦屨文錦兌宮搜風姨畢宿犯雨妾欵
韓 颯沓一枕聞懜騰萬念攝文錦曉寒加臥被殘暑退搖

箒欽韓白波跳明珠黑雲埋短堞文錦高壘智保蟻鮮衣

癡敗蜨欽韓紅英低罨階丹棧落鏘塢文錦秋卉浸欲爛

踈林撼如惛欽韓檐瓦滴喧庭蕉舞拉撒文錦對景各

慘淡健步空蹀躞欽韓香稻熟紅蓮小鮮登烏鯨文錦枱

投沈遠鐘饑饉畢朝飪欽韓爐香添小炷書牀翻舊篋文

錦石炭調瓶笙粉蟬走雲笈欽韓角技及手談輸平轉心

懾文錦效名士捉麈呼童子佩鞞欽韓歌詩黃門忠論說

左師讐文錦賞心已闕闔旁睨漫偵僕欽韓頓忘淫雨阻

肯受煙霾壓文錦到晚張華鎧滿案陳杯櫟欽韓喝月月

不起舉觥觥能疊文錦酌醴更啐栖啜羹不用挾欽韓酒

鎗卷淥醽肉弗飮乾腴文錦雲車詎可攀鵝管為誰撫欽

韓祇宜塵酒兵拊戰羞三捷文錦癡腹觀朶頤雄心相長

鬣欽韓那廿拜下風不覺窺雙頰文錦汜人愁風鬢雲階

掩笑靨欽韓清影惜沈埋豪情借補貼文錦大杓向籃傾

半弦取牆帖欽韓掩戶聽沈沈墮懷望跼跼文錦秋水瞳

雙翦長叉紅一捻欽韓結璘幽期卜吳質愁鬢鑷文錦恍

惚桂宮遊襪桂亂翬禡欽韓根觸鳳窠夢瓊瑜雜些麤文

錦昔年客淮壖此景憶蒼雪欽韓烏榜隔橫塘紅牙閒長

缺文錦華堂鳴珠佩廣坐衷羅襪欽韓篋舫悲珥璫囊衣

病殮殍文錦官燭風簾橫白袍棘門躡欽韓比屋悽蛩吟

繚垣列虎櫺文錦 羈情我爛漫文戰君跨躡欽韓 健翮遲

扶搖行鞚肯疲茶文錦 倦遊門獨掩居憂淚同裛欽韓 卽

此共朝昏差足解愁懽文錦 點筆倚闌干聯襪泛艚艫欽

韓春店賁新醞秋山把長袂文錦 湖光駭吐吞雲容快轉

摺欽韓 談清酒不渾句險意翻協文錦 此情都蕭索寸衷

寧安帖欽韓 可哀憶武夷有悟昧迎葉文錦 路阻目乃瞪

籟作耳空聶欽韓 燭跋嫌暘眩詩狂嗔嚅囁文錦 林蕞戢

醜形巢雝聒疎睫欽韓 樹火爍流星魅風墮黃蛺文錦 明

眸泣瓊瑰銖衣綻縟縠欽韓 姹女闕遙靚顧兔瓠善蹠文

錦幽懷絳紗封恨事綠章牒欽韓 爲奉白玉盤直向重雲

籥文錦 天公忽相笑利口逞喋喋欽韓 生涯伴寂寥清光

總歛歛文錦 無分到長圓有情忍一霎欽韓 終古耀激輝

牢憂多攢袂文錦 每當馬首看忽忽縛袴褶欽韓 或作屋

梁猜熒熒沾襦縶文錦 雖洗碧海空那禁愁人接欽韓 穹

廬望李尉紈扇掩班婕文錦 不如淡泊遭母令虛僑挾欽

韓光景恣流連無乃笑伉俠文錦 虛室坐王潺慧地證劉

總欽韓 生白止吉祥談元互敵敵文錦 伊戚毋自貽得咎

易動輒欽韓 海氛已漸清民星在所燮文錦 映灰尚團圞

掇梯休僂捷欽韓 古鏡重摩抄初鉦待昱晔文錦 瓜蔓水

瀾瀾羊角風獵獵欽韓 陰翳埽吠藍明發同登涉文錦

送褚孝廉 通經 入都

幽草沿階日閉關公非應自號劉攽借書還後猶餘味乞
米來時更厚顏夢破五更呼皓月雨連三日洗秋山與君
攜屐靈巖路猶幸窮愁腰腳頑

何事天涯欲跨鞍選期秋末集長安柳當蕉萃江頭折月
正團團馬上看傳世有心宜勸學涪人無術莫求官最憐
貢禹無田賣老向空山戴鶻冠

立秋後二日同吳玉松太史江鄭堂吾半客胡眉峯
石遠樸集淡如齋中

騎秋雨過度涼颼商畧傾家薄醉宜已有車公稱雅集每

勞韋丈誦新詩詞場冤氣澆杯酒春夢空花覆局碁莫把
三原比癡腹徐家肺與沈家脾

龍尾車歌 并序

龍尾車漑器也沈上舍 培 案泰西水法作之兩人關其
輪日漑一夫之田始試於墾地而利可以被天下若倣
古區田法以此車給水旱澇不憂穀入倍常豈不善乎
遂為作歌

泰西水法明所傳有權可操雨師先四柯為軸取諸圍八
繩埒臬眠其懸甲乙丙丁分星躔削竹為柱牆細編斜行
輒爾迤中邊參分軸二繩椽縷餘令水溝相洞旋水行屈

曲入耳涎性欲就下忽已遷信其軸圍合中權版以錮水
必積堅用長之防鐵篆旃樞重三鋒兩端平中分過綫無
少偏度岸角亢架檣聯鼈騰陽馬句股弦兩輪差次用櫂
連下輪爲尻承以肩服見日月左右旋爲物有六漑器全
甌窶連臂援飲泉汙邪臥波龍躍淵丁男嬉若蹋浪然一
吸可盡萬夫川旱入澇出功不專漢魁瀆沸逮園屢翻車
渴烏徒芟芟課最豈獨效宮堧要令天下蒙安便烏虜是
在牧守賢三千七百區陌阡五耕五耨室突埏辨土審時
三盜捐此車趣澤常豐年可惜我無負郭田

題徐葵蒲團拈句圖

廿載詩名筆有神黃芝不蹋輦紅塵蒲團只是閒滋味豈
了花天酒地身

婀娜福地更陳芳愁劇年來五穀囊學喫山厨瓊瑤粥消
君詩句得枯腸

閉門不學陳無己好友同舟便訪僧夢裏石泉槐火句長
明燈是讀書燈

日午茶烟裊鬢絲比宅官韻押來遲可知一字吟安後畧
似高僧出定時

鮑貞女詩 并序

貞女光州固始人幼字董氏待年會大祿轉鬻於沈觀

察家爲婢久而無所歸矢不復嫁觀察憐其志亦弗強
今年已四十餘雙鬢垂頸給使甚謹不以貧窮易其志
始則矜以節終則立以義是可尚已觀察子培乞詩以
寵之

蒙鳩失其巢雌雄各西東來日大難歸路過絕不可憑符風

一切其因風訊鄉里不逢播塔郎但見雄兔撲朔雉朝雒黃

蒿蒙密上大牆其二下九浴蘭日媒者致綢繆生死郎未卜

日月忽云除貞女默無言淚落如貫珠其三主人大憐職許

誓滄浪天但爲傅婢哺郎健不使卷衣秦王前其四身今四

十垂亂髮臂不係琅玕琥珀龍亦無崑山潤毛之玉撥惟

有約指環是家下定物其五憶昔背尊章門前指流水流水

有西歸古井波瀾深不起其六曲歌女貞木心同卷施草沒

期魂魄無不之生各天涯戢影老其七

清明日遊支硎遇雨飯舟中遂上靈巖夜入香山

衣香鬢影動林泉不定陰晴百五天拾翠前山夢行雨分

胜小市飯谿煙風鈴自答生香屨松蓋誰停軟玉鞭卻望

五湖雲水闊倚篷詩思滿歸舫

霖雨稍止柳翁招集書齋醉賦一絕畱別

糟牀滴酒亂檐聲一夕酣歌喝月行陌上花開歸去好趁

扶殘醉聽黃鶯

送吳太史雲服闋還館四首

老氏藏書所道家蓬萊山先生富學殖氣凌鼉董間三年
 居東觀撰述不可刪春暉不相假流涕風木攀一卷紀行
 詩紙上有餘潛諸老多動念著作望早還酒酣濡大筆草
 敕開天顏新霜脫木葉車馬發吳關自惟雲泥隔身無半
 通綸顧視真登仙揮手離塵寰屈指當元會鵠立蛾眉班
 公居文章職更爲風雅主流俗如頽波砥柱賴撐拄何人
 據壇坫跌宕破規矩號召輕薄徒儼然立門戶野狐假色
 笑祇巫媾歌舞氣焰有時熄流毒已中蠱紛紛噉名客偃
 僂出塵土百卷書未讀千秋業自詡忸怩懷行卷齷齪廁

門簿譬諸造明器何可近簋簠公其升高座一喝震聾瞽
 京師人海中奇材會接武

散材在深山亦恐燎野火孤生常自嗟墮地卽輒軻竊幸
 全大璞周旋仍是我殘枯冷炙間撫腹不取果雅辱大君
 子拂拭及磊砢或是憐其窮引手置帖妥舉以告衆人呀
 口無一可妄庸何足數高明慙負荷廟廊與畎畝寄迹終
 相左顏色慘於秋干旌遞旂旒媿非張季鷹不獲隨輕舸
 聖明握金鏡四海歌康衢獨茲秦蜀間小醜稽天誅中夜
 坐歎息齷齪自笑愚不如一健兒執戈效前驅久令三方
 人芻粟困輓輪先生歸玉堂論思勿面諛直言衆或怨朴

忠帝自俞古來儒臣職豈辨爲貞符况今數元老若五星
連珠何如請前席嶽嶽陳英圖指揮鐵如意談笑吞賊廷
釋默可嘗以趙高
邑鐵如意爲贈 欲明心捧日當令膽滿軀賤子居草野
想望無時無

重九登靈巖山

著屐猶勝著鞵鞵不容愁裏過重陽菰蘆有土山同瘦羅
綺無人士自香茶臼寺樓敲落日酒旗邨店舞新霜卻呼
月魄隨歸徑更送鍾聲到野塘

歲暮葉大廖二自香山邀予泛舟石湖登楞伽山拈
有韻成六百字卽送其歸里

細雨作泥塗尖風欺破牖夜雨一燈侵曉夢重衾誘敲門
到榜人褰裳同好友望晴或聳肩促衰猶掄肘日落山欲
埋水枯舟不受促坐衣誤牽紆行篙苦揉市火淡如星村
醪劣於滂方伸三尺喙不縮五斤手先生東家邱弟子齊
人丑脫鞵真欲殼解冠幾可漉此際舞杯杵一笑脫枷杻
胥口宿畱宜湖滸跌宕久束濕聊舉爨分熟不嫌盾薄醉
已傾盃高歌亦擊缶有廟壓怒濤繚垣背高阜伍相
祠 夾道
松楸長到門神鬼醜樹恩遭抉目乞靈謹頰首拔劔何敢
指投玳寧應否萬頃洗酸寒千年笑枯朽黷脂出見跋擊
柝歸遇撤停橈香水旁杖策橫山右野園竹樹交荒徑狐

兔瓜葉橫山先生清霜暮芒屨敗葉覩敝帚澗草被芷蘭

山石雜瓊玖層久碾階硬古苔齧車輶眉邊好山長杯底

徵湖瀏薑鹽雜煎茶擣熬共飯糗祇諱大月草難折殘秋

柳轉眼忽寥落捫心誰老壽臥虎想潭潭離鴻傷優優使

臣甘雪甍英主勤獮搜豈知田園興不使禮樂傾石湖別墅今太

守某公重構嵌壁十餘碑乃石湖手書田園雜興詩精藍架萃律曲墜勢蚴蟻不見

海生潮但怯杵投日飛烟裊薜蘿浮沫跳鰕歸靈虵挽佛

髻幽鳥吐仙綬遙聽楞伽山鐘聲殷弁琇遂越治平寺湖

光泛星留四山張鬣隸獨樹戰颼颼枯菱鋪繭滓怪石蹲

印鈕鈴語答巢鵲泉穴竄蒼颯僧數僅三三佛火消九九

古錐肅幡幢明神潔尊卣象教固難變淫祀不宜有五郎

鮮袍笏一媪陳鏡紐封羊儼用享積鏹以為禳真同野庶

悲回憶姣人慟姑蘇指飛鳥臺榭悵遊麀歸路數帆幅平

岡勒馬紂探奇每賈勇嗜醉動得咎願畱十日飲寧羨連

城守窮鬼計最急山賊名何忸結綬未半通讀書誰二酉

人情堪荷荷山色慙負負好詩愁欲釀清福貧難狃獻歲

期探梅早春可薦韭槃飡未遺母宋史歐陽守道傳里人聘為子弟師主人問其

每食舍肉密歸遺母壺觴好謀婦一事君勿忘滴紅強名酒舟中泔酒不可

飲醲燒春所漬楊梅和之余因戲名滴紅

落花四首

玉釵敲斷下簾旌一抹春痕悵碧城
細雨連階和響屣午風隔院點空
杵珠塵舞罷疑嬌喘金粉妝殘尚
宿醒韻字窗紗心字篆亂紅幾撇未
分明

洞簫聲歇翠眉愁
菽菽殘紅千尺投
匝地烟濃鶯語碎
下山風急馬蹏柔
有情壓住斜陽尾
無賴驚回短夢頭
從古綠珠遺恨在
曲瓊小響怯高樓

半卷牆陰半入池
新苔禁受碧波知
賣花深巷金鈴小
鬥草芳園玉漏遲
撲蝶風輕仄影扇
迴身香重吸華絲
閒拋紅豆調鸚鵡
粉絮初團擁淚時

繡床坐久唾紅絨
腸斷釵聲玉色中
春夢無心殘月墮
香

魂有迹曉雲空
曲闌撲蝶還成
隙小苑啣鶯不
一叢莫向百花洲
上望雨絲渾與
淚痕融

飛絮四首

非花還作似花看
斜入妝樓笑鏡鸞
燕子乍衝香霧濕
美人初逗夾衣寒
東風蘊藉猶能受
淡月朦朧已不瞞
莫僅永豐坊裏住
離魂倩爾逐征鞍

看朱成碧盼空閨
轉綠迴黃罨大隄
偶弄淡晴篴作粉
若黏小雨釀成泥
香浮珠箔收么鳳
夢遶銀牆唱碧雞
心上眉頭總有恨
鞦韆架外畫樓西

麴塵風卷暗青門
帽影鞭絲共斷魂
撲水煙消迷夕照
蹋

歌花落淡黃昏霑來蝶粉全無迹點上鴉黃始有痕作出
 離人千點淚春寒繡被試溫暾
 捫遍闌干玉一梭風吹池皺綠萍多慵拈斑管婁羅歷愁
 入征衫企喻歌春色三分勞遠夢晴絲百丈轉橫波小蠻
 未改要支細流落天涯喚柰何

幼學堂詩稿

辛酉起訖
壬戌秋

吳縣 沈欽韓 文起

贈狄處士 春城

圓六三點證摩醯法喜周生自作妻識得深山梅子熟謾
 人語是止兒唬

競言五味祖師禪多向門前倒刹竿拈起布毛吹少許禿
 居士輩解看

神珠能解蛻蝨毒法界華嚴彈指呈記取佛鐙挑隻箭江
 湖原不礙人行

丈室同參老古錐淡知煩惱種如來鬼神覩見修行念平

地應愁起骨堆

初秋夜坐二首

清秋似窮士觸物多哀吟銀河挾雨氣虛警生遙林涼颼
蘇病骨淡雲織秋心蛛絲巧縈緒蟲語苦垂箴夜久聞滴
露疎鐙寒欲侵可憐鴛鴦瓦誰遺水晶鍼明星搖古劔大
地鳴雅琴古懽渺難即抒情憶繁欽

高梧倚簷端動搖清灑氣風露浣詩腸燈火思禪味虛籟
出瓶笙鬧若茶眼沸巢痕戀鷓鴣機響悲絡緯萋萋美人
愁離離客子畏駐車誰造尹執版或見尉箕舌味寧別壺
耳音難彙空谷哀寒香爛漫羞野卉

廖茂才以詩畱別次韻酬之

歲暮團瓢縮似蝸著書仰屋感蒼華叢殘詩付秋墳唱磊
落人从曉鏡夸陶峴江湖多載酒葛洪妻子欲攜家雲龍
隨逐天猶吝獵獵西風五兩斜

蒯緱好揖坐談劉花落長亭聽曉籌紅粉賞心金鑿落綠
天圍夢玉雕鏤衣香潤雨融春淚馬力隨風軟客愁一事
與君消銀鏗撼城東下是河流

時廖有淮
安之遊

偶題

嫩寒好自下湘簾爲憶羅浮香夢吹欲拂芭蕉寫幽恨有
人先我上睂尖

一縞雲重嬾擡頭萬種思量未肯休如此黃昏還細雨幸
儂相對伴清愁

臘盡舉一男越十日而失之

壯髮披齊額靈雲散集肩試啼寧痛嗑與乳亦流涎已擲
浮盆果同分壓歲錢特豚慙未接蓬矢幸新懸書策遺猶
後屠蘇酌最先商量作湯餅顛倒拆衣綿伯仲行新列宗
支世舊編錫名思鄭重推命怕迤邐崇忽逢星子胎應浴
紫淵抱持纔十日生死算逾年眼眴何知戀宵長可得延
珠還雖有日玉冷已無煙不忍離衾褥終須掩墓田雨如
揮別淚月正上初弦此後餘香滅當時喜氣傳誰言魂尙

小便共鬼爲緣故物休振觸遺胞并棄捐溫顏病妻慰轉
念長男憐孤露傷三載生涯賸一毡昂藏幾老大別有涕
潺湲

伏英華清賜浴圖

驪山溫泉出神女遺唾猶香波跳啣會昌城築置長湯白
石爲梁七寶飾沈香山子狀瀛洲玉環前夢應能識扶下
飛霜殿砌遲

長安志飛霜殿寢殿也

汗融繡袜剛晡食已受恩深睂

尙顰可憐態弱腕無力頗黎碑映識頰顏玉蓮花捧聞香
息濺沫應驚銀雁浮噴泉頻把羅巾拭洧盤窺宓是何人
鈹鏤舟撐故相逼宛轉生綃著自輕遲回慵髻挽猶側墜

釵著體拊不留膚與玉鸞同一色晚粧散暑瑤光樓笑指
明星璇室織迎孃吹笛蠻兒歌此日崖公蜺斗極豈知池
有長黃虯一躍漁陽敵雲黑望春洗兒拋赤錢延秋避賊
攀金勒冰肌玉骨化游魂芳澤蘭湯畱不得胡兒浴馬復
磨刀寶甕血胜苔蘚蝕禍水從來滅火井空傳嗚咽流階
城一幅吳衣曹帶新千年皓齒明眸卽沈沈雲海想流鈴
著手摩抄報翰墨欲挽天河洗甲兵吞聲詩老空追憶

鍾吾山雙髻庵

蟹堞色蒼莽棧石勢深杳嶺日淡於雲林颺捷過鳥墮窮
得隴寬壁立綠寺小佛髻門遠青柱華濯秋皎靜綠袈裟

上遠香薜蘿遶入座鶴夢縈餐秀詩腸飽振策僅巖半雨
花已戶表山骨冷松根白紗媚叢筍起尋樵唱歸茶煙剝
竿裊

晨步虎山緣東崦至石泚庵

月痕破遠村市聲迴叢薄山風掠衣稜湖浪吞雲脚網懸
翠荇牽樓側古藤絡秋柳不籠烟野花猶釘萼卻望東西
崦渺然濠梁託蓑笠元真趣鰕菜鴟夷約巒容有遠近濃
淡色自著煙雨空濛中仙人倘宗寔松門依小徑濩歌遠
佛閣團蒲喜小榻重把芭屨縛

由米堆山抵馳道入聖恩寺

興與秋飈高意嫌飛鳥懶巖花悅寺古池魚戀萍暖空廊
躡易響石戶懸常鍵心宗炷香消目騁張帆滿松濤帶霜
鐘勢若萬蹏散筆研試禪床湯餅漉齋盃緇流偶接席福
命言最遠上座恆拙推予命言最秀出豈知仰屋梁窮愁天不管危亭
瞰上方壁陡人影短山鬼呼亂雲平地日脚斷

鯉山

山皆種桂居民以此為生業

鯉山在湖濱橫鬣閃濃翠植桂一萬株繁葢金天媚連蜷
爍龍鱗頡頏簷鳳翅祇園六百弓明金佈佛地廣寒八萬
戶香雨飄仙帔分風迨古魂節日蕩秋思水妃靚妝窺石
骨餘馨醉連朝愁釀雨青翬連臂三富女有殘膏貧戶無

餘稅作米但量斗撮花不插髻林外送歌聲搖颺晴光碎

作米撮花皆山中方言

宿雨初霽登漁洋山絕頂遂越法華

北風斷檐雨林巒面新醜彎澗村色幽出沒帆影碎四圍
露人髻千步瀆龜背絕陁外獐拒重隙中差對午雞足下
鳴萬瓦若在確癡雲舉杖鞭頑仙揮袂退浮峯七十二一
一掃修黛浪花涌珠宮應有凌波態法華結雕股鳳鬣屹
而戴石瘦屐齒齧寺欵佛眉礙笑詩狂揆幽如壯士出塞
清景盡討逋造物終不耐

還元閣呈恆拙上座

鬢絲禪榻喜消停落日孤明樹杪亭僧蹋白雲攜露卯客
捫古壁識風丁岩堯佛閣松杉舞宋靜叁廚鳥雀聽便欲
御風凌絕頂五湖七十二峯青

金宮詞一百首

帳前撒速賀如雷促坐琵琶笑靨開九隊馬連雲五色太
師今作克汗來

薩那並馬看揚旗金牒盛來大軟脂戰鼓無聲半天紫寧

江月出澹蛾眉 大金國志夫謂妻為薩那妻謂夫為愛根

來流河畔馬翻塵芍藥花開朶朶銀如雪刀光皇帝寨鷓

鴟一曲踏陽春

孃子多居阜宿園山前樺角報黃旨金符奏得燕京路愁
殺蕭妃奉至尊

艸青幾度盼雙眸房帥隨行進綠籌煮茗焚香雙陸戲天
家何事不風流

國書小字似銀鈎五色翔鸞寶錄修催賜庫中金吐鵲史
官勅宴五雲樓

瑤池宴罷解羅襦金縷鞦提倚阿姑博得崖公多蜺斗地
衣亂落粟黃珠

閤門鞭響報班齊傘子山呼習宋儀八寶黃羅分左右親
看御押印紅泥

劍鋒揮處看嫦娥笑說吳山策馬過繡了羅衾他日用幾人鏡裏蹙雙蛾

女伴能呼總管名死央七十二分明軟金袋向牛兒賄小

說休提八駿行張仲軻傳幼名牛兒說傳奇小說海陵引之左右以資戲笑

管弦聲與笑啼俱琴院多隨御女車誰向夜深歌赤鳳喚

人倒篋洗裙裾

繡簾媚蝶笑相遺房老猶稱來夢兒不敢香階輕剗鞞暗

中但聽佩聲知海陵宮人至夜不許下殿又禁不得然燭

小名按錄喚來頻儷白妃青說秘辛一自水晶屏內見頰

顏無奈效顰人

一局圍棋劫未消孝經何忍誦東朝猶嫌繡箴金鉍箭只

射飛鴉不射梟海陵諸子傳光英射鴉獲之海陵大喜命薦原廟

金錢纔看綵盤圍鹵簿千人謁廟歸監婢抱來能學語佩

刀換得老人衣

夢裏曾傳到玉霄黃皮袴把苣紋挑江南果是神仙窟試

聽郎中望海潮

拜天臺近築毬場正是黃橙初上綱却進紫茸貂煖手榛

拾酒泛菊花香

牛頭稅作棗梨錢賽著明金舞袖鮮恐把蹋鴟巾樣改內

人禁帖孟家蟬

漢字親从宮教師碧紗幃外日遲遲歸來莫把羊車盼對

食惟同假厮兒后妃傳凡諸妃位皆以侍女服男子衣冠號假厮兒

南使籠歸千鈔茶外官未許鬪新芽日長只合淡宮品賭

得圍腰醬瓣樺

頻拭羅巾醉纈融花陰零亂上簾櫳寶林鞞袖低傳旨為

日紅來為酒紅

迴廊碧瓦柳枝高內院春衣試剪刀三月狀元當放榜謝

恩先要賜緋袍

大享親安神射碑歌頭迎駕綵旗隨御樓要放金雞詔泛

索添供笑靨兒

衍慶宮垂繡幄重牛魚應為薦新供白頭良侍紅綃淚許

到今朝識御容禮志薦新正月鮓明昌間用牛魚

桃皮筆葉駕前調春水秋山試射鵬更向大房燒飯去奉

陵女插玉逍遙

黃麾細仗上京來孛堊更番進壽杯共聽阿家翻本曲拱

宸管向教坊催

錦轡絲鞭簇射堦雙桓插柳鼓騰騰金龍御箭連鞦射看

取鵝黃杷子承禮志當射者從尊卑序各以帕識其處

魚藻池邊拜月回百頭帳底卸鸞釵禁中自有蓮花漏不

許司辰曉執牌

御膳朝來減大官只緣烽未報平安戲排毬仗風流陳要
泥天顏一笑看

御爐煙裏袞龍瞻玉冊昇來神聖兼尊號字多先暗記山
呼微笑動眉尖

香閣湯官具餅茶遠人曲宴禮儀加昭華瑄響辭丹陛紗
帽橫簪色絹花

御果盈床壽紫宸八欄翠袖拂珠塵酒闌分得金剛鐲解
道新禧似忒鄰忒鄰海也

聖明齋肅獻新宮拜起勞應掖侍中鸞輅聲和歌導引御
街新柳起微風

勝子當階引宋臣班躋三品奏書頰天顏入內猶微愠只

為吞瓊噉雪人

大金集禮宋使到闕於三品官班內間插

毬場早立阜鵬旗看肉飛仙奮杖馳記得韓王稱第一每
牽龍馬賜教騎

聞遣金牌闡刺還口脂面藥破愁顏姪朝昨上遺畱物便
賜西宮玉假山

苑中勅祭主林神移植姚黃繡幄春都監奏知開內宴郎
君休笑作詩人

承華生日集貂璫雁粉安排七寶牀好作主人酬玉杓食
官還進臥沙羊

硬黃紙鎮玉雙駝小印朱文舊政和花蕊夫人詞百首晴
肉寫與定哥歌

黃梅花鞞老鴉盤鴿炭熏爐火未寒共戲擊蒙金葉子至
尊今夜宿齋壇

穿過長廊蝴蝶飛瓊林苑裏綠初肥都知休置婁羅歷祇
門宜男艸便歸

檐前鳥解誦金經內藏黃縑助飯僧無怪煬王添罪過柳
條曾向國師懲

女職承顏捧研餘漢家制度問何如閤門近日親傳旨但
却文園諫獵書

大金國志有事三令臣下不諫曰作樂飯僧園場

翠巒閣上芰荷風紫袖擎來琥珀紅笑指漢人金杙坐不
知身致太平功

玉華門內散香煙振肅傳呼御駕前幾股湘江龍骨瘦香

羅袖裏喚朝天

章宗聚骨扇詞見劉祁歸潛志

鴛鴦掣得海東青翰苑傳詩鳳輦停知道家風怕嬌情鞦

韃相約打宮庭

活雁休教進御廚天中卅至饌伊蒲侍宸新授長生籙分

乞宮中却鼠符

勃脫雙翹岩洞春像生花朵上頭新妝臺正對瓊花島略

似安妃住玉真

張師顏南遷錄宸妃宋華原郡王鄭居中曾孫女善舞雙勃脫又于蘄山輦白石築

岩洞於芳
華閣前

人月圓詞唱別宮楊花到處舞東風玉堂催跋飛龍紀更
喚朱瀾宴禁中

三日洗兒看翦鬢一枝藤杖祝康強中官啟建元真醮龍
飾肩輿拜綠章

解愁曲奏鬢雲鬆牀下軍書不發封傳語酒坊添釀法愛
王近已出和龍

百官志酒坊使掌醞造
御酒及支用諸色酒醴

東明閣上畫屏風恍在宣和艮嶽中畫了長眉批內降十
三行字粉痕融

千官放仗解鳴珂避暑瑤臺指絳河已近官家天壽下閒

翻酒令教宮娥

南遷錄十四年詔擇民間女年十三以上
有姿色慧黠者各三百人進入教酒令

樓前點檢紫茸軍燈火鼇山閣十分小輦親來開雉尾珠
簾一朶舞香雲

仙韶爨舞未消愁一笑端須瑋瑋頭膝上錦裙容易皺不

因仙去被人留

宸妃每坐章宗
郝上見大金志

果馬穿花度曲欄夜燒鹿尾宴金盤珠簾不捲羊燈暗唱
得春愁小契丹

東宮內設讀書堂馬上稱書論首陽一首幽風同創業萬
春節內侑瑤觴

勅首還求孟四元雲璈雙塢奏宵闌却觀侍讀終場策只

恨當時讀卷官

選舉志就憫忠寺試廷單鑑等寺舊有雙堦進士入院之夜半聞東堦上有聲如音

樂入西宮

驛馬頭顱萬里來
班荆館伴押綱催
省差行首紅羅傘
拜表先聞盧鼓椎

溫暾妃錦漫添香譜
得新詞春恨長
聞置榷場花壓鎮
金籠要買雪衣孃

阜紗廚帖玉籤齊
排類都教應奉題
不奈重陽佳節到
狀元詩句粲瓠犀

獨窠羅換舊簾旌
春帖今朝已進呈
冰窖金澗堪潤筆
教書裙帶黨懷英

中朝冊寶受黃封
命婦分班入廟從
夾道衣香兼鬢影
錦華蓋擁玉芙蓉

金橋昨夜度天孫
小隊宮鞦韆
牢燭分報道謝恩
同繡輦捲簾先要看郎君

枇杷子進剝春蔥
繡袜生綃映玉紅
每惜官家不禁暑
今年須幸景明宮

歸潛志宋使至金進枇杷子

攬瑜圍座隔窗紗
奏進神童內省夸
作罷艸書加膝上
替梳雙髻更簪花

琳池風緩阜羅衫
翦出唐花綴碧巖
喜得南朝增歲幣
尙方工作勅都監

外廷受馘立黃麾拜表千官滿赤墀待得駕回宜啟賀金

花箋紙撰丞儀百官志皇后位下女職丞儀掌左右給事宣傳啟奏

伏熊枕上掩屏山剛召醫官候脈還小鈿龍團纖手捻守

宮褪後帶銀環

春風催發吉祥花百寶闌干倚欲斜手擘軟金盃上壽正

宣插食岸烏紗歸潛志章宗擘橙為軟金盃

鼓山一幅鳳皇圖映壁銅華手自摹好向盛時修福德乞

錢七萬造浮屠

淮上取回緋翅軍來寧館伴慶生辰要求慈福蘭亭帖好

遣臨池諸貴嬪

瑤光樓上拜雙星盤列西瓜鵝鶩青催作御袍文繡署金

梭夜半乞涼亭松漢紀聞北地西瓜圓而色青翠味甘脆中有汁尤冷

大內傳呼立叔王死央符事發昭陽幾年又兆矛端火階

下夫人碧血香

偉能暴室已魂銷并遣昭儀自擣椒昔日枉將余琬怒受

恩侍讀立三朝完顏匡欲專定策功搆致承御賈氏元妃李氏罪又衛王即位後章宗遺詔言朕之內人見有娠者二章宗崩三日而稱范氏胎氣有損則實出于衛王意旨也匡本為章宗侍讀

狐登御榻事如何浮碧池頭灑淚過銀作馬槽金酒甕百

年家計怕干戈

天家宵旰議南遷萬兩明駝揮玉鞭飛勅教催黃鶴袖才

人拉颯抱箏弦

細雨鸞旂暮角推呼來行殿淚粧開從官可惹燕山恨把
筆題詩銅雀臺

大駕先聞渡衛河望仙髻挽抱雲和紫羅半臂征塵拂更
要添香熨鈿窩

雪香亭上擘新柑春暈紅潮酒半酣後日上元須放夜買
燈中使至淮南

一隔乘輿九十年牙籤秘閣故依然也應灑淚家居壞銀
燭如燐遺表傳

紙錢署令勅先支雲地裁身繡折枝尚有通元門內恨羶

車歷碌北行時抹捩蓋忠傳中都妃嬪聞盡忠出奔皆束裝至通元門盡忠乃與愛妾及所親者先

出城不復顧矣

夜合花開春思酣烏拖白練水拖藍閒穿金綫床頭坐自

繡羅旛上佛龕

睡迤涼亭四面開深紅滿架拂玫瑰新頒寶券當千貫襯

褥團花打馬來食貨志貞祐通寶一貫當千貫

潼關烽火斷征鴻又說紂軍掠故宮檢點珠鞍并玉帳要

將公主去和戎元史類編云紂音冥

神運峯頭吐絮雲榴花何必妒紅裙繡人辛苦征袍作催

給山東花帽軍

舳艫舟通淮水行涼樓閒坐說功名君王自艸南征詔待

占西湖棄汴京舳艫舟見宋史李全傳

一隊紅燈金鳳輿半弦月正下階除瓊香亭子同攜手記

得生年雙玉梳

良家合子同心賜繡帶盤綾奉至尊雙淚誰家金谷怨香

車軋軋出宮門

閭分金錢費御椿夫人自在醉銀缸靜街遲起龍樓鼓宮

籍新添白酒龐歸潛志宣宗外戚多微賤有頭巾王白酒龐之號又宋帝母姨號自在夫人

晚坐東樓塵聖衷金蓮燭撤玉堂中寶裝犀軸熏龍腦明

日宣麻立九公

寶冊分移御幄前玉屏風下看比肩兩宮徽號同時上故

事都依天德年

冕服初成內殿朝女官贊拜笑迴腰阿婆試看還相稱應

奉鸞輿廣利橋河渠志大定二十八年詔盧溝河今建石橋明昌三年三月成勅命名曰廣利

一家骨肉共傳餐玉楪何分瑪瑙盤不識新皇猶榷楚主

臣無奈殿頭官

侍臣益政院兼銜襄漢旋開告急函一帶荷花舊龍德淚

痕空對太平巖地理志仁智殿有二太湖石左曰敷錫神運萬歲峯右曰玉京獨秀太平巖

秦山破碎汴流丹不作西京留守官叔父肯言家國事却

看阿渾涕汎瀾金人名子為阿渾

承天門外哭麻衣小苑芙蓉慘落暉一隊繡旗忠孝字爲君忼慨破重圍

馬軍數百却弓梢便捨宮廷指浚郊道得官家宜保重絳

紗袍上淚珠拋

完顏奴申傳上出京服絳紗袍乘馬導從如常儀

衛士相從賜鋌金橫刀早撞省門深空將妖夢青城悟誰似摩訶院裏心

阜笠黃衣過吹臺生靈頓盡慟蒿萊可憐照碧堂中坐更

禁將軍跋扈來

遺山集虎賊尹大興張公著與諸御史發其奸章宗言胡沙虎定何罪但跋扈耳卿

等不相容如此耶公著同中丞孟鑄言聖明之朝豈容有跋扈將軍乎

御廚分結練江魚羸卒創殘尙一呼無恨幽蘭軒裏事猶

堪枯骨笑黃奴

元宮詞一百首

大帳欄聯乞烈恩山呼看豎九旂旗一囊細乳長筵列爭

記渾河共飲豈

白翎雀住比君情怕說西天萬里行歇馬第三鞞耳朶笑

擎漆盃合銀箏

親灼羊脾吉兆開算灘金葉表文來雪山高處愁天叫更

召神仙爲鎮雷

駝車九十白氊陳投下分茅內宴頻但聽弩絃千步響轟

旗先插十功臣

新頒扎撒整朝儀
甲馬如雲各一羈
四隊銀刀分白道
諸王拜舞撒花隨

內家新住萬安宮
額點黃螺髻
暈紅小注一行回
鵲歷臂紗解後月如弓

埽鄰城外草如煙
金鳳當頭寶笠偏
誰道驕牛騎不得
却緣微妒更生憐

五戶絲從腹裏輸
坊場撲買更收租
不須重放羊羔利
便購回回答納珠

牛心幄殿與扶頭
五部傳觴渾脫求
萬歲天王十歲釀
蒲萄戶是醉鄉侯

金靈馬載帝邦喪
國母臨朝出箭房
宿烈孫裘珠比甲
繡旗風軟出紅妝

昂灰膝上袞來看
髮刷膠青碧甸冠
特按豹言猶在耳
最憐風雪擴端寒

東平乍送樂工全
龍笛篳篥奏御前
丹詔聽宣必閣赤
祭天卽趁鼠兒年

袞龍法服未香消
笑倚薰籠替勒腰
著體不須頻照鏡
罕今愛好勝南朝

鵠立談書多秀才
雙龍金翦白袍裁
內中故事猶能說
皇后曾酬萬戶栳

譯來通鑑夜親披綵袖低垂蠟鳳嬉不用頻夸廉孟子吾
王已作大宗師

寶篆歡呼一冶完龍岡位正紫薇垣一時忙殺聰書記官
制纔頒復紀元

如霜馬漣灑龍庭蒙古巫來語細聽纏白羊毛拋綵段天
皇福蔭託安寧

省內登歌樂降神駝峯熊白上供新秋來院裏重燒飯先
聽呼名鐵木真

泊中飛放踞鷹房煮得羹鮮草上霜毛綫成灰芻狗碎擁
鬢笑道舊災禳

紫檀殿裏奏興隆孔雀佳鬢影應節同更召雲和開雜劇看
磨戲竹曲將終

猊餽飢棗乞浮盆氈帳移居奏至尊撒答海時傳扁食紅
綾捏就月兒痕

泥金白繖到春迎穿過紅門遍內城樓上比肩珠箔卷香
煙卅里繡幡明

河西務走快行家綺縛黃皮脚力夸直到御前呼萬歲奉
銀一餅出南衙

雲都赤立響刀鍔豹首班聯劔鏑班先是如雷呼控鶴分
行紫袖露天顏

兩宮出閣玉琤琤
劈正中門對寶幢
約略秀眉齊御榻
金爐煙裊亦成雙

侍儀引宴簇紅鞞
火不思彈回鶻歌
細肋黃羊堪飽啖
蒲萄酒是醉人多

春思絲絲擁呂姑
女兒節又插釵符
玉階閒佇青莎滑
滋味如嘗押不蘆

天家鐵馬出和林
置甲親縫兩襜鉞
憶著冰花垂御帳
寶山漏下夜沈沈

紅璣原是舊羊皮
更練弓弦作毳衣
植得階前誓儉草
便同萸萸耀朝暉

光天門外唱班齊
寶錄先朝襲錦緹
十二牒分神御殿
行宮妃子背妝唬

箭拂金輿蠟樹紅
納妃箋賀滿青宮
織金臥褥香消後
更緝駝絨課女功

商鐙人鬧內城家
小輦旁从覩魯花
別帳夜畱南海子
桐官催進醞都車

總持玉印坐朝端
蒙古新書內府看
賀表正須天壽節
桃花紙仿翰林官

輿擁顏顏刺馬隨
四男枕可應熊羆
明朝佛頂金輪會
自解珠衣助祝釐

楊瑀山居新話
刺馬卽帝師

火輪竿擁鎮邪魔
擦擦泥搏十萬多
寶石斗量拋海畔
小黃河自不生波

集賢院內費餐錢
臥對屏風講榻前
迤北大魚傳狗站
蓬池斫膾御廚宣

仗回骨朶放朝參
御押軍書鳳諾諧
八彩眉開饒喜色
伯顏表已定江南

儀鸞供帳費黃羅
筵賜三宮十次多
今日大朝應盱食
預教典膳煮頭鵝

一寢金龍殿柱橫
合尊師向吐蕃城
却憐枉殺文丞相
筮日宮中點燭行

異樣局名爭看錦繡堆
延春閣內笑顏開
玉桃蓋與金絲簾

位下閒時博進來

才人小小輦旁扶
牧草青時幸上都
日射帽簷金碧色
紫羅窄袖挾雕弧

泡子河邊林壑殊
七星堂壁自規摹
掖庭女伴還尋玩
新揆河源一幀圖

上苑春風透肉寒
垂楊回首洞房看
鏡臺閒送遊蠶過
壓著羅巾翠腕闌

手鐲見元氏掖庭記

鬧蛾兒顫玉搔頭
仿得南裝壓鬢稠
愛看腰間貓眼活
教傳番舶耍雙抽

共說光齋有布衣五龍車送殿庭歸內人自乞王孫畫朶朶珠花插帽圍

水燈夜放玉河邊密咒傳持膜拜前却笑中賢施外學脂

香粉印佛能憐

寧獻王通鑑博論至元十八年闢儒道二教爲外學貶孔子爲中賢

羊車路熟到昭陽押忽垂珠帳角光內降斜封傳省裏廣寒殿外月如霜

黑龍江外急邊烽檢點隨營御帕封醉倚五山珍御榻君

行馬滑又霜濃

相約前幫到御溝妃央如綺散芳洲殘脂傾入金河口都作桃花片片浮

香殿臨書點畫明學生親署御名呈研朱良娣低低說勒帛休加著好評

卞和墜出拘哥家匣奉黃綿至寶夸笑指明金包一角不如玉貌妾無瑕

寶案爐煙殿角風內廷讀冊集三公妝成不暇熏香坐常駕宣隨隆福宮

宮門細樂響雲璈禿魯麻來幡蓋高爭向轎車前助福香囊繡得繫黃袍

宣徽院內領牙牌功德新修六道齋隨喜壇前秘密佛戲將方響叩鸞釵

眞珠簾內燭花舒錦像中宮瞻謁初看到散拋茶飯畢齋
孃道從上腰輿

重光小厄動星文門館先成推戴勳他日傳觴呼阿合陁
山茅屋暗秋雲

五花殿榜迴流鈴日煖金苔鶴屐翎御筆教傳章佩監絡
珠作詔選娉婷

阿速親軍扈遠郊愛蘭乳酪進行庖呼鷹臺上漫天雪片
炙黃羊石火敲

獵蕙風輕寒食初上林百品進嘉蔬栽花笑擔金鴉觥新
看農桑輯要書

宮門獵獵綵旗斜兩狀元來擁絳紗惹得桂枝香在手玉
音親導替簪花

尊號初加頒赦條玉容武帳壓花翹誰言長信秋風早
錦溫香絳蠟燒

天語親傳代出家御衣局爲作袈裟閻浮六十四種字香
案繙來筆粲花

萬年觴舉慶朝簪冊禮儲皇拜跪堪此後天家休厯慮周
王早遣鎮雲南

齋垣玉輅振鸞聲綵殿纔臨珠淚橫歸到石橋儀仗退尙
宮先索問安名

瀆山玉海酒千卮供御琵琶棕殿隨說法隊過齊贊佛殿
前歡唱史騾兒

風入涼亭響井梧靈星祝罷撥金爐大禧諏吉當親祀點
燭同看鹵簿圖

鹿頂樓連響屨斜藏鉤戲罷拓凶紗紅絲磴合宜男藥回
鵲新求打里牙

司香女自蹙雙蛾中瑞鎔成佛像多珠作袈裟金作字尙
憐碧血蘸南坡

水精殿內帝師瞻遊遍皇城擁繡簾參豹車中傳樂部紅
妝微笑寶花拈

埽鄰館閣制書徵龍亢山中醮事增白鋌新鐫元寶字泰
安州廟助香燈

碑漏迢迢滴御堦拔都皆佩虎文鞞追鋒車報懷王至各
埽長眉鞞睡鞋

白浮野外鐵衣光奉御紅旗督戰忙洗血歸朝圍御繖手
提金印太平王

經制書編汗簡青奎章御座列紗屏至尊好事開門館怯
薛官閒盡授經

藝文羣玉領官司共賦承平曲宴詩博士臣題邀御印內
官奉出玉盤螭

布施馬載大行車玉几金牀位竟虛一帶柳林畱恨色更
修脫卜赤顏書

御茶園裏進頭綱秘色磁窯注老湯斜倚隱囊聽蟹眼螺
鈿几上喚添香

九九寒消碾玉鈴早春撲蝶穆清亭垂楊一樣淡宮閉倚
著東風眼已青

軟金答子襯紋綾牋表新从孃子稱總管簿來脂粉尸上
元時節扎珠燈

花帽蠻奴按象馴虎坊肉價日千緡西湖權轉觀靈囿孔
雀雙飛妒玉人

麥飯誰澆宰木寒羶車呼出淚偷彈舞衣色淡鴛鴦會舊

製先朝史道安

縫人也

南郊大次禮儀多執笏史官記不訛登陛先標皇帝字天
顏微笑燎壇過

圍宿軍隨坐正衙書生瞎眼謾塗鴉可知夢裏南唐主乞
作織兒破趙家

金綫挑花女手摻質孫御服四時絨曝衣樓上看書簿寶
篋香濃惹紫衫

雀翎翠羽織朝衫興聖詞頭進寶函龍鳳牌成頌上輔真
珠密字繫官銜

月池橋轉影雙蛾齊唱江南水調歌遙指綵樓天樂奏衣
香鬢影亂清波

殿前山子玉爲梯翠袖分花戲捉迷誰著羽衣眠桂樹洞
房深處月宮題

坐部多宣郭順時鳳鞵點拍小楊枝御筵撤送金花燭拜
賜纏頭下赤墀

卷軸珍藏印玉章先生挾冊到書堂湯官每奉西宮旨捧
出髻盤玄玉漿

窮綺香塵漸欲拋高麗采豔備偏髻至尊演揲兒能慣不
用醫官慎郵膠

龍舟勅造內官監萬歲山邊錦作颿一曲疑香翻鳳尾珍
珠繖有綵雲銜

花鬢肩鞞象牙冠舞得諸天帶笑看榻上珠塵風欲定飛
僊已報立金槃

羣官勅斷內廷趨房帥多推三聖奴卻望雨來菩薩綫替
鋪煖答世穉穉

碑文史館進呈封上相河平慶九重裁就羅袍玉列赤藏
香同祭小金龍

魚羹宋嫂仿廚刀饌子還須副冷淘報道新瓜龍慶熟便
興子戰賭分曹

幼學堂詩和卷五
丞相宮廷起屬觴
燻煙報已熄
灤陽脂香風送聞
低語那
壁宜爲太上皇

繡絲裘薄轉涼飈
金脊銜樓度玉簫
但使練裙家法共不
妨
遍唱石人謠

宣文閣外亂鳴笳
椒寢塵封手詔斜
選得麗人親挽髻
綠車教送相公家

鐵騎驕嘶向夕曛
橫鞭馬鬣送郎君
大河以外無完土
又見怱怱立撫軍

雁門深處是皇都
橐駝難償段阿奴
獨坐肉屏彈出塞
點蒼山月照人孤

百年家國翠眉低
無復天桃女共攜
生恨居庸關外樹
亂雲遮斷鳳樓西

幼學堂詩稿卷五



